

張文昌集卷之二

五言律詩

薊北旅思

日日望鄉國空詞白紵詞長因送人處憶得別家時
失意還獨語多愁祗自知客亭門外柳折盡向南枝



江南春

江南楊柳春日暖地無塵渡口過新雨夜來生白蘋
晴沙鳴乳燕芳樹醉遊人向晚青山下誰家祭水神

西樓望月

城西樓上月復是雪晴時寒夜共來望思鄉獨下遲
幽光落水塹淨色遍霜枝明日去千里此中還別離
別鶴

雙鶴出雲谿分飛各自迷空巢在松頂折羽落江泥
尋水終不飲逢林亦未栖別離應易老萬里兩淒淒

江陵孝女

孝女獨垂髮少年唯一身無家空托墓王祭不從人
相吊有行客起廬無舊隣江頭聞哭處寂寞楚花春

送宮人入道

舊寵昭陽裏尋仙此最稀名初出宮籍身未稱霞衣
已別歌舞綴長隨鸞鶴飛中官看入洞空駕玉輪歸

送越客

見說孤帆去東南到會稽春雲剡溪口殘月鏡湖西
水鶴沙邊立山廳竹裏啼謝家曾住處煙洞入應迷

贈辟穀者

學得餐霞法逢人與小還身輕曾試鶴力弱未離山
無食犬猶在不耕牛自閑朝朝空漱水叩齒草堂間

思江南舊遊

江臯三月時花發石楠枝歸客應無數春山自不知
獨行愁道遠回信畏家移楊柳東西度茫茫欲問誰
夜到漁家

漁家在江口潮水入柴扉行客欲投宿主人猶未歸
竹深村路遠月出釣船稀遙見尋沙岸春風動草衣
送邊客

揚旌過隴頭隴水向西流塞路依山遠戍城逢笛秋
寒沙陰溼溼疲馬去悠悠爲問征行將誰封定遠侯
不食姑

幾年山裏住已作綠毛身護氣常稀語存思自見神
養龜同不食畱藥任生塵要問西王母仙中第幾人
古苑杏花

廢苑杏花在行人愁到時獨開新塹底半露舊燒枝
晚色連荒轍低陰覆折碑茫茫古陵下春盡又誰知
送流人

獨向長城北黃雲暗塞天流民屬邊將舊業作公田
擁雪添軍壘收冰當井泉知君住應老湏記別鄉年

宿臨江驛

楚驛南渡口夜深來客稀月明見潮上江靜覺鷗飛
旅宿今已遠此行猶未歸離家久無信又聽搗寒衣

送蠻客

借問炎州客天南幾日行江連惡谿路山遶夜郎城
柳葉瘴雲濕桂叢蠻鳥聲知君却迴日記得海花名
襄國別友

曉色荒城下相看秋草時獨遊無定計不欲道來期
別處去家遠愁中驅馬遲歸人渡煙水遙映野棠枝

送遠客

南原相送處秋水草還生同作憶鄉客如今分路行
因誰寄歸信漸遠問前程明日重陽節無人上古城

山中贈日南僧

獨向雙峯老松門閉兩涯翻經上蕉葉掛衲落藤花
甃石新開井穿林自種茶時逢海南客蠻語問誰家
征西將

黃沙北風起半夜又翻營戰馬雲中宿探人冰上行
深山旗未展陰磧鼓無聲幾道征西將同收碎葉城

寄友人

憶在江南日同遊三月時採茶尋遠澗鬪鴨向春池
送客沙頭宿招僧竹裏碁如今各千里無計得相隨
送防秋將

白首征西將猶能射戟支元戎選部曲軍吏換旌旗
逐虜招降遠開邊舊壘移重收隴外地應似漢家時
律僧

苦行長不出清羸最少年持齋唯一食講律豈曾眠
避草每移徑濾蟲還入泉從來天竺法到此幾人傳
答僧拄杖

靈藤爲拄杖白淨色如銀得自高僧手將扶病客身
春遊不騎馬夜會亦呈人拚此歸山去深宜戴角巾
靈都觀李道士

山觀雨來靜遶房瓊草春素書天上字花洞古時人
泥竈煮靈液掃壇朝玉真幾迴遊閬苑青節亦隨身
送韋評事歸華陰

三峯西面住出見世人稀老大誰相識慙惶又獨歸
掃窓秋菌落開篋夜蛾飛若向雲中伴還應着褐衣
送閩僧

張文貞公集
幾夏京城住今朝獨遠歸脩行四分律護淨七條衣
谿寺黃橙熟沙田紫芋肥九龍潭上路同去客應稀
送海客歸舊島

海上去應遠蠻家雲島孤竹船來桂府山市賣魚鬚
入國自獻寶逢人多贈珠却歸春洞口斬象祭吞吳
登咸陽寺北樓

高秋原上寺下馬一登臨渭水西來直秦山南去深
舊宮人不任荒碣路難尋日暮涼風起蕭條多遠心
送從弟戴玄往蘄州

楊柳聞門路悠悠水岸斜乘舟向山寺着屐到漁家
夜月紅棋樹秋風白藕花江天詩景好迴日莫令賒
送朱慶餘及第歸越

東南歸路遠幾日到鄉中有寺山皆遍無家水不通
湖聲蓮葉雨野氣稻花風州縣知名久爭邀與客同
過賈島野居

青門坊外住行坐見南山此地去人遠知君終日閒
蛙聲籬落下草色戶庭間好是經過處唯愁暮獨還

酬韓庶子

張文目集
西街幽僻處正與懶相宜尋寺獨行遠借書常送遲
家貧無易事身病是閑時寂寞誰相問祇因君自知
贈姚合少府

病來辭赤縣案上有丹經爲客燒茶竈教兒掃竹亭
詩成添舊卷酒盡卧空餅闕下今遺逸誰瞻隱士星
送僧遊五臺兼謁李司空

遠去見雙節因行上五臺化樓侵曉出雪路向春開
邊寺連烽去胡兒聽法來定知巡禮後解夏始應迴

送鄭才歸寧

桂檝綵爲衣行當令節歸夜潮迷浦遠晝雨見人稀
野艾到時熟江鷗泊處飛離琴一奏罷山雨霽餘暉
送李評事遊越

未習風塵事初爲吳越遊露沾湖草濕日照海山秋
梅市門何在蘭亭水尚流西陵待潮處知汝不勝愁
閑居

東城南陌塵紫幘與朱輪盡說無多事能閑有幾人
唯教推甲子不信守庚申誰見衡門裏終朝自在貧
寄昭應王中丞

借得西街宅開門渭水頭長貧唯要健漸老不禁愁
獨凭几藤書案空閑竹酒鉤春風石甕寺作意共君遊
酬孫洛陽

家貧相住遠齋館入時稀獨坐看書卷閑行着褐衣
早蟬庭笋老新雨徑莎肥各離爭名地無人見是非
送人任濟陰

黃綬在腰下知君非旅行將書報舊里畱褐與諸生
贈別盡沽酒惜歡多出城春風濟水上侯吏聽車聲

晚春過崔駙馬東園

閑園多好風不意在街東早早詩名遠長長酒性同
竹香新雨後鶯語落花中莫遣經過少年光漸覺空

夏日閑居

多病逢迎少閑居又一年藥看辰日合茶過卯時煎
草長晴來地虫飛晚後天此時幽步遠不覺到山邊

晚秋閑居

獨坐高秋晚蕭條是遠思家貧長畏客身老轉憐兒
萬種盡閑事一生能幾時從來疎懶性應祗有僧知

和陸司業習靜寄所知

幽室獨焚香清晨下未央山開登竹閣僧到出茶堂
收拾新琴譜尋封舊藥方逍遙無別事不似在班行

酬韓祭酒雨中見寄

雨中愁不出陰黑盡連宵屋濕唯添漏泥深未放潮
無爲憐馬瘦少食信兒嬌聞道韓夫子還同此寂寥
和裴僕射移官言志

身在勤勞地常思放曠時功成歸聖主位重委羣司
看壘至邊石閑吟篋裏詩蒼生正瞻望難與故山期

酬西二十二舍人早春曲江見招

曲江冰欲盡風日已恬和柳色看猶淺泉聲覺漸多
紫蒲生濕岸青鴨戲新波仙掖高情客相招共一過

和周贊善聞子規

秦城啼楚鳥遠思更紛紛况是街西夜偏當雨裏聞
應投最高樹似隔數重雲此處誰能聽遙知獨有君

送李騎曹靈州歸觀

翩翩出上京幾日到邊城漸覺風沙起還將弓箭行
席箕侵路暗野馬見人驚軍府知歸慶應教數騎迎

寒食夜寄姚侍御

貧官多寂寞不異野人居作酒和山藥教兒寫道書
五湖歸去遠百事病來疎况憶同懷者寒庭月上初
題清徹上人院

古寺臨壇久松間別起堂看添浴佛水自合讀經香
愛養無家客多傳得効方遇齋長不出坐卧一繩床
和裴司空卽事通簡舊僚

肅肅上台坐四方皆仰風當朝奉明政早日立元功
獨對赤墀下密宣黃閣中猶聞動高韻思與舊僚同
使回畱別襄陽李司空

江亭寒日晚絃筦有離聲從此一筵別獨爲千里行
遲遲戀恩德役役恨公程迴首吟新句霜雲滿楚城
經王處士原居

舊宅誰相近唯僧近竹關庭閑雲滿井窻曉雪通山
來客半畱宿借書多寄還明時未中歲莫便一生閑
不食仙姑山居

寂寂花枝裏草堂唯素琴因山曾改眼見客不言心
月出溪路靜鶴鳴雲樹深丹砂如可學便欲住幽林

江頭

晚步隨江遠來帆過眼頻試尋新任客少見故鄉人
回首憐歸翼長吟任此身應同南浦鴈更見嶺頭春
寄孫冲二王簿公

低折滄洲簿無書整兩春馬從同事借妻怕罷官貧
道僻收閑藥詩高笑古人仍聞長吏奏表乞鎖廳頻
贈任懶

未肯求科第深坊且隱居勝遊尋野客高卧看兵書
點藥醫閑馬分泉舊遠蔬漢庭無得意誰擬薦相如

舊宮人

詞舞梁州女歸時白髮生全家沒蕃地無處問鄉程
宮錦不傳樣御香空記名一身難自遂愁逐路人行

春日留別

遊人欲別離醉後對花枝看却春將晚莫輕年少時
臨行記分處回首是相思各向天涯去重來未有期
沒蕃故人

前年伐月支城上沒全師蕃漢斷消息死生長別離
無人收廢帳歸馬識殘旗欲祭疑君在天涯哭此時
望行人

秋風窻下起旅鴈向南飛
日日出門望家家行客歸
無因見邊使空待寄寒衣
獨倚青樓暮烟深鳥雀稀

宿江店

野店臨西浦門前有僑花
停燈待賈客賣酒與漁家
夜靜秋江白路迴山月斜
閒尋泊船處潮落見平沙
薊北春懷

渺渺水雲外別來音信稀
因逢過江使却寄在家衣
問路更愁遠逢人空說歸
今朝薊城北又見塞鴻飛

雪溪西亭晚望

雪水碧悠悠西亭柳岸頭
夕陰生遠岫斜照逐迴流
此地動歸思逢人方倦遊
吳興耆舊盡空見白蘋洲

冬夕

寒蛩獨罷織相續鴈猶鳴
月色平窻入鄉心半夜生
不成高枕夢復作遠堦行
迴首嗟淹泪城頭北斗橫
山中秋夜

寂寂山景靜幽人歸卧遲
移琴當月下漉酒對花時
新露冷茆席暗泉衝竹離
西峯採藥伴此夕恨無期
聽夜泉

張文昌集
細泉深處落夜久漸聞聲獨起出門聽欲尋當澗行
還疑隔林遠復畏有風生月下堪畱此無人亦到明

夜宿黑窰溪

夜到碧溪裏無人秋月明逢幽更移宿取伴亦探行
花下紅泉色雲西乳鶴聲明朝記歸處石上自書名

贈同谿客

幽居得相近煙景每寥寥共伐臨谿樹同爲過水橋
自教青鶴舞分採紫芝苗更愛南峯住尋君路恐遙

出塞

秋塞雪初下將軍遠出師分營長記火放馬不收旗
月冷邊帷濕沙昏夜探遲征人皆白首誰見滅胡時

嶺外逢故人

過嶺萬餘里旅遊經此稀相逢去家遠共說幾時歸
海上見花發瘴中唯鳥飛炎州望鄉伴自識北人衣

送閑師歸江南

徧住江南寺隨緣到上京多生脩律業外學得詩名
講殿偏追入齋家別請行青楓鄉路遠幾日盡歸程

贈箕山僧

引文目集
久住空林下長齋耳目清蒲團借客坐石甃憚人行
似鶴難知性因山強號名時聞衣袖裏闍招念珠聲
送徐先生歸蜀

日暮遠歸處雲間仙觀鍾唯持青玉牒獨立碧雞峯
陰洞新生乳寒泉舊養龍幾時因賣藥得向海邊逢
寄紫閣隱者

紫閣氣沉沉先生住處深有人時得見無路可相尋
野鹿伴茅屋秋猿守栗林唯應採靈藥更不別營心
贈隱者

先生已得道市井亦容身救病自行藥得錢多與人
問年常不定傳法又非真每見隣翁說時時使鬼神
登城寄王秘書

聞君住鶴嶺西望自依依遠客偏相憶登城獨不歸
十年爲道侶幾處共柴扉今日煙霞外人間得見稀
舟行寄李湖州

客愁無次第川路重辛勤藻密行舟澁灣多轉楫頻
薄遊空感惠失計自憐貧賴誦汀洲句時時慰遠人
送南客

行路雨條條青山盡海頭天涯人去遠嶺北水空流
夜市連銅柱巢居屬象州來時舊相識誰向日南遊
送友人歸山

出山成白首重去結茅廬移石修廢井掃龕盛舊書
開田畱古樹分洞與僧居長在幽峯裏樵人見亦疎
畱別江陵王少府

迢迢山上路病客獨行遲况此分襟日當君失意時
寒林露遠驛晚燒獵荒陂別後空回首相逢未有期
鄂州贈別王七使君

昔是詞狂客今爲酒病夫強吟翻悵惘從醉不歡娛
鬢髮三分白交親一半無郢城君莫厭猶較近京都
送新羅使

萬里爲朝使離家今幾年應知舊行路却上遠歸船
夜泊避蛟窟朝炊求島泉悠悠到鄉國還望海西天
題山中古祠

春草空祠暮荒林鳥雀飛紀年碑石在經亂祭人稀
野鼠緣朱帳陰塵蓋畫衣近門潭水黑時見宿龍歸
古樹

古樹枝柯少枯來復幾春
露根堪繫馬空腹定藏人
蠹節莓苔老燒痕霹靂新
若當江浦上行客祭爲神
漁陽將

塞深沙草白都護領燕兵
放火燒奚帳分旗築漢城
下營看嶺勢尋雪覺人行
更向桑乾北擒王問磧名
送南遷客

去去遠遷客瘴中衰病身
青山無限路白首不歸人
海國戰騎象蠻州市用銀
一家分幾處誰見日南春
和左司元郎中秋居十首

選得閒坊住秋來樹木肥
風前卷菌簾雨裏脫荷衣
野客畱方去山童取藥歸
非因入朝省過此出門稀
又

有地唯栽竹無池亦養鷺
學書求墨跡釀酒愛朝和
古鏡銘文淺神方謎語多
居貧閒自樂豪客莫相過
又

閒來松菊地未省有埃塵
直去多將藥朝回不訪人
見僧收酒器迎客換紗巾
更恐登清要難成自在身
又

自知清靜好不要問時豪就石安琴枕穿松厭酒槽
山情因月甚詩語入秋高身外無餘事唯應筆硯勞

又

開堂新掃酒稱是早秋天書客多呈帖琴僧與合絃
莎臺乘晚上竹院就涼眠終日無忙事還應似得仙

又

醉倚班藤杖閒眠瘦木牀案頭行氣訣爐裏降真香
尚儉經營少居閒意思長秋茶莫夜飲新自作松漿

又

每憶舊曾山居新教上墨圖晚花迴地種好酒問人沽
夜後開朝薄申前發省符爲郎凡幾歲已見白髭鬚

又

菊地纔通屐茶房不壘階憑醫看蜀藥寄信覓吳鞋
盡得仙家法多隨道客齋本無榮辱意不是覺安排

又

林下無拘束閒吟放性靈好時閒藥竈高處置琴亭
更選居山記唯尋相鶴經初當授衣假無吏換門鈴

又

客散高齋晚東園景象偏
晴明猶有蝶涼冷漸無蟬
藤折霜來子蝸行雨後
涎新詩纔上卷已得蒲城傳
思遠人

野橋春水清橋上送君行
去去人應老年年草自生
出門看遠道無信向邊城
楊柳別離處秋蟬今復鳴
哭山中友人

入雲遙便哭山友隔今生
遶墓招魂魄鑿巖記姓名
犬因無主瘠鶴爲見人鳴
長說能尸解多應別路行
宿廣德寺寄從舅

古寺客堂空開簾四面風
移床動栖鴿停燭聚飛蟲
閑卧逐涼處遠愁生靜中
林西微月色思與審家同
宿邯鄲館寄馬磁州

孤客到空館夜寒愁卧遲
雖沽主人酒不似在家時
幾宿得歡笑如今成別離
明朝行更遠迴望隔山陂
遊襄陽山寺

秋色江邊路煙霞若有期
寺貧無利施僧老足慈悲
薜荔侵禪窟蝦蟆占浴池
閑遊姝未徧卽是下山時
酬裴僕射朝迴寄韓吏部

獨愛南關裏山晴竹杪風從容朝早退瀟灑酒客常通
案曲新亭上移花遠寺中唯應有吏部詩酒每相同

和李僕射秋日病中作

由來病根淺易見藥功成曉日杵臼靜涼風衣服輕
猶疑多氣力漸覺有心情獨倚紅藤杖時時堦上行

早春病中

羸病及年初心情不自如多申請假牒祇送賀官書
幽徑獨行步白頭長懶梳更憐晴日色漸漸暖貧居

送嚴大夫之桂州

旌旆過湘潭幽奇得徧探涉城百越北行路九嶷南
有地多生桂無時不養蠶聽訶難辯曲風俗自相諳

詠懷

老去多悲事非唯見一毛眼昏書大字耳重覺聲高
望月偏增思尋山易發勞都無作官意賴得在閑曹
使至藍谿驛寄太常王丞

獨上七盤去峯巒轉轉稠雲中迷象鼻雨裏下筆頭
水沒荒樁路鴉啼古驛樓君今在城闕肯見此中秋

贈海東僧

別家行萬里自說過扶餘得學中州語能爲外國書
與醫收海藻持咒取龍魚更問同來伴天台幾處居
寄漢陽故人

知君漢陽住煙樹遠重重歸使雨中發寄書燈下封
同時買江塢今日別雲松欲問新移處青蘿最北峯
送西安將

萬里海西路茫茫邊草秋計程沙塞日望伴驛峯頭
雪暗非時宿沙深獨去愁塞鄉人易老莫住近番州

題李山人幽居

襄陽南郭外茅屋一書生無事焚香坐有時尋竹行
畫苔藤杖細踏石筍鞋輕應笑風塵客區區逐世名
早春閑遊

年長身多病獨宜作冷官從來閑坐慣漸覺出門難
樹影新猶薄池光晚尚寒遙聞有花發騎馬暫行看
贈太常王建藤杖筍鞋

蠻藤剪爲杖楚筍結成鞋稱與詩人用堪隨禮寺齋
尋花入幽徑步月下寒堦以此持相贈君應愜素懷
和戶部令狐尚書喜裴司空見招看雪

南園新覆雪上宰曉來看誰共登春榭唯聞有地官
色連山遠靜氣與竹偏寒高韻更相應寧同謠吹歡
春日李舍人宅見兩省諸公唱和因書情卽事
又見帝城裏東風天氣和官閑人事少年長道情多
紫掖發章句青闈更詠謠誰知常寂寞終日斷經過

和裴司空以詩請刑部白侍郎雙鶴

皎皎仙家鶴遠畱閑宅中徘徊幽榭月嘹唳小亭風
丞相西園好池塘夜水通欲將來放此賞望與賓同
同錦州胡郎中清明日對雨西亭宴

郡內開新火高齋雨氣清惜花邀客賞勸酒促謠聲
共醉移芳席畱歡閉暮城政閒方宴語琴筑任遙情
莊陵挽謠詞三首

白日已昭昭干戈亦漸消逆師新出道從諫早臨朝
佞倖威權薄忠良寵錫饒丘陵今一變無復白雲謠
又

觀風欲巡洛習戰日開池始以三年政旋開七月期
陵分內外使官具吉凶儀渭北新因路蕭笳加遠更悲

又

曉日龍車動秋風闐闐開行帷六宮出執紼萬方來
慘慘郊原暮遲遲挽唱哀空山煙雨夕新栢遶陵臺

水

蕩漾空沙際虛明入遠天秋光照不極烏色去無邊
勢引長雲濶波輕片雪連江洲杳難測萬古覆蒼烟

送安法師

出郭見落日別君臨古津遠程無野寺宿處問何人
原色不分路錫聲遙隔塵山陰到家節猶及蕙蘭春

寄靈一上人初歸雲門寺

寒山白雲裏法侶自招携竹逕通城下松門隔水西
方同沃洲去不作武陵迷彷彿遙看處秋風是會稽

夏日閒居

無事門多閉偏知夏日長早蟬聲寂寞新竹氣清涼
閒對臨書案看移曬藥牀自憐歸未得猶寄在班行

老將

鬢衰頭似雪行步急如風不怕騎生馬猶能挽硬弓
兵書封錦字手詔滿香筒今日身憔悴猶誇定遠功

張文昌集卷之四

五言排律

省試行不由徑

田裏有微徑賢人不復行孰知求捷步又恐異端成
從易衆所欲安邪患亦生誰能達大道其此竟前程
子羽有遺跡孔門傳舊聲今逢大君子士節自光明
夏日可畏

赫赫溫風扇炎炎夏日徂火威馳迥野畏景鑠遙途
勢矯翔陽翰功分造化鑪禁城千品獨黃道一輪孤

張文正公集
落照頻空竈餘暉卷夕梧如何倦遊子中路獨踟躕
罔象得玄珠

赤水今何處遺珠已渺然離婁徒肆目罔象乃通玄
皎潔因成性圓明不在泉暗中看夜色塵外照晴天
無脛真難搆懷疑寶易遷今朝搜擇得應免媚睛川
和李僕射雨中寄盧巖二給事

郊原飛雨至城闕濕雲埋迸點時穿牖浮漚欲上堦
偏滋解籜竹併灑落花槐晚潤生琴匣新涼滿藥齋
從容朝務退放曠掖曹乖盡日無來客閑吟感此懷

酬李僕射晚春見寄

戟戶洞初晨鶯聲雨後頻虛庭清氣在衆藥濕光新
魚動芳池面苔侵老竹身教鋪嘗酒處自問探花人
獨此長多病幽居欲過春今朝聽高韻忽覺離埃塵
憶盧常侍寄華山鄭隱者

獨住三峯下年深學煉丹一間松葉屋數片石花冠
酒待山中飲琴將洞裏彈開門移遠竹剪草出幽蘭
荒壁通泉架晴崖曬藥壇寄知騎省客長向白雲閑
和令狐尚書平泉東莊近居李僕射有寄

平地有清泉伊南古寺邊漲池閑遶屋出野徧澆田
舊隱離多日新隣得幾年探幽皆一絕選勝又雙全
門靜山光別園深竹影連斜分採藥徑直過釣魚船
雞犬還應識雲霞頓覺鮮追思應不遠賞愛諒難偏
此處堪長往遊人早共傳各當恩寄重歸卧恐無緣

送鄭尚書出鎮南海

遠鎮承新命王程不假催班行爭路送恩賜併時來
牙旆從城展兵符到府開蠻聲喧夜市海色浸潮臺
畫角天邊月寒關嶺上梅共知八公望重多是隔年迴

徐州試反舌無聲

夏木多好鳥偏知反舌名林幽還共宿時過卽分聲
竹外天空曉豁頭雨自晴居人宜寂寞深院益淒清
入露啼宿失當風閑易驚來年上林苑知爾最先鳴

贈潑山人

鬱鬱山中客知名四十年恹惶身獨隱寂寞性應便
世業公侯籍生涯黍稷田藤懸讀書帳竹繫網魚船
已種千頭橘新開數脉泉閑遊携酒遠幽語向僧偏
入洞題松過看花選石眠避喧長汨沒逢勝卽畱連

自古多高跡如君少比肩耕耘既辛苦章句已流傳
昔日交遊盛當時省閣賢同袍還共弊運轡每推先
講序居重席羣儒願執鞭蒲堂虛左待衆目望喬遷
才異時雖用情高道自全畏人顏慘澹疎物勢迤邐
賢者聞知命吾生復禮玄深藏報恩劔久緝養生篇
憔悴衆夫笑經過郡守憐夕陽悲舊鶴霜氣動饑鷗
處士誰能薦窮途世所捐伯鸞堪寄食元淑苦無錢
策蹇秋塵裏吟詩黃葉前故裘餘白領廢瑟斷朱絃
志氣終猶在逍遙任自然家貧念婚嫁身老戀雲煙
放逸栖巖鹿清虛飲露蟬鄭逃秦谷口嚴愛越溪邊
霄漢予猶阻榮枯子不牽山城一相遇感激意難宣

新城甲仗樓

謝氏起新樓西臨城角頭圖功百仗麗藏器五兵修
結締棖薨固虛明戶檻幽魚龍卷旗幟霜雪積戈矛
暑雨熯蒸隔涼風寔位畱地高形出沒山靜氣清優
睥睨斜光徹欄干宿靄浮芊芊秔稻色脉脉苑谿流
郡化王丞相詩成沈隱侯居茲良得景殊勝峴山遊

和李僕射西園

遇午歸閑處西庭敞四簷高眠着瑟枕散帙檢書籤
印在休通容山晴好捲簾竹涼蠅到少藤暗蝶爭潛
曉鵲頻驚喜疎蟬不許拈石苔生紫點欄藥吐紅尖
虛坐詩情遠幽探道侶兼所營尚勝地雖儉復誰嫌

小苑春望宮池柳色

小苑春初至皇衢日更清遙瞻萬條柳迥出九重城
隱映龍池潤參差鳳闕明影宜宮雪曙色帶禁煙晴
深淺殘陽變高低曉吹輕年光正堪折欲寄一枝榮

張文昌集卷之五

七言律詩

書懷寄元郎中

轉覺人間無氣味常因身外省因緣經過獨愛遊山
客計較唯求買藥錢重作學官閑盡日一離江島病
多年陸君釣去詞中說便欲南歸傍小船

書懷寄顧八處士

自小信成疎懶性人間是事總無功別從僊客求方
法時到僧家問苦空老大登朝如夢裏貧窮作活似

村中未能即便休官去慚愧南山採藥翁

贈王秘書

早在山東聲價遠曾將上策佐嫖姚賦來詩句無閑
語老去官班未入朝身屈祇聞詞客說家貧多見野
僧招獨從書閣歸時晚春水渠邊看柳條

贈令狐博士

頭白新年六十餘近聞生計轉空虛久爲博士誰能
識自到長安賃舍居騎馬出隨尋寺客呼兒散寫乞
錢書古來賢哲皆如此應是才高與衆疎

贈王司馬

白笏朱衫年少時久陪班列會朝衣貯財不省關身
用行義唯愁被衆知藏得寶刀求主帶調成駿馬乞
人騎未曾相識多聞說遙望長如玉樹枝

酬秘書王丞見寄

相看頭白來城闕却憶漳谿舊往還今體詩中偏出
格常參官裏每同班街西借宅多鄰水馬上逢人亦
說山芸閣水曹雖最冷與君長喜得身閑

謝裴司空寄馬

張文昌集
駮耳新駒駿得名司空還自寄書生乍離華廐移蹄
澁初到貧家舉眼驚每被閑人來借問多尋古寺獨
騎行長思歲旦沙堤上得從鳴珂傍火城

送裴相公赴鎮太原

盛德雄名遠近知功高先乞守藩維
衛恩暫遣分龍節署勅還同在鳳池
天子親臨樓上送朝官齊出道邊
辭明年塞北清蕃落應建生祠請立碑

寄元員外

外郎直罷無餘事酒掃書堂試藥爐
門巷不教當要關詩篇轉覺足功夫
月明臺上唯僧到夜靜坊中有酒沽
朝省入頻閑日少可能同伴舊遊無

贈梅處士

早聞聲價滿京城頭白江湖放曠情
講易自傳新註義題詩不着舊官名
近移馬跡山前任多向牛頭寺裏行
天子如今議封禪應將束帛請先生

贈王秘書

不會浪出謁公侯唯向花間水畔遊
每着新衣看藥竈多收古器在書樓
有官祗作山人老平地能開洞

穴幽自領閑司了無事得來君處喜相畱

贈道士宜師

自到王城得幾年巴童蜀馬共隨緣兩朝侍從當時
貴五字聲名遠處傳舊住紅樓通內院新承墨詔賜
齋錢閑房暫喜居相近還得陪師坐竹邊

書懷寄王秘書

白髮如今欲滿頭從來百事盡應休祇於觸目須防
病不擬將心更養愁下藥遠求新熟酒看山多上最
高樓賴君同在京城住每到花前免獨遊

題韋郎中新亭

起得幽亭景最新碧莎地上更無塵琴書看盡猶嫌
少松竹栽多亦稱貧藥酒欲開期好客朝衣暫脫見
閑身成名同日官連署此處經過有幾人

送揚州判官

應得煙霞出俗心茆山道士共追尋閑憐鶴貌偏能
盡暗辯桐聲自作琴長嘯每來松下坐新詩堪向雪
中吟征南幕裏多賓客君獨相知最校深

喜王起侍郎放牒

東風節氣近清明車馬爭來滿禁城二十八人初上
牒百千萬里盡傳名誰家不借花園看在處多將酒
罷行共賀春司能鑒識今年定合有公卿

送校江劉明府

老看青衫爲楚宰平生治業有誰知家僮從去愁行
遠縣吏迎來怪到遲定訪玉泉幽院宿應過碧澗早
茶時向南漸漸雲山好一路唯聞唱竹枝

送從弟徹東歸

緱山領印知公奏才稱同時盡不如奉使賀成登冊
禮陪班看出奉恩書去迴在路秋塵裏受詔辭歸曉
漏初早晚得爲朝署拜閑坊買宅作隣居

哭胡十八遇

早得聲名年尚少尋常志氣出風塵文場繼續成三
代家族輝華在一身幼子見生才滿月選書知寫未
呈人送君帳下衣裳白數尺墳頭栢樹新

贈賈島

籬落荒涼僮僕饑樂遊原上任多時蹇驢放飽騎將
出秋卷裝成寄與誰拄杖傍田尋野菜封書乞米赧

時炊姓名未上登科記身屈惟應內史知

逢王建有贈

年狀皆齊初有髭鵲山漳水每追隨使君座下朝聽
易處士庭中夜會詩新作句成相借問閑求義盡共
尋思經今三十餘年事却說還同昨日時

移居靜安坊荅元八郎中

長安寺裡多時住雖守卑官不厭貧作活每常嫌費
力移居祇是貴容身旋開井淺偏宜樹漸覺街閑省
踏塵更喜往還相去近門前減却送書人

送楊少尹赴鳳

詩名往日動長安首首人家卷裏看西學已行秦博
士南宮新拜漢郎官得錢祇了還書舖借宅常思事
桑欄今去岐州生計薄移居偏近隴頭寒

送韓侍御歸山

聞君久卧在雲間爲佐嫫姚未得還新結茆廬招隱
逸獨騎驄馬入深山九靈洞日行應到五粒松枝醉
亦攀明日珂聲出城去家僮不復掃柴關

新除水曹郎答白舍人

年過五十到南宮章句無名荷至公黃紙開呈相府
後朱衣引入謝班中諸曹縱許爲仙侶羣吏多嫌是
老翁最幸紫薇郎見愛獨稱官與古人同

送楊少尹赴蒲城

官爲本府當身榮因得還鄉任野情自廢田園今作
主每逢耆老不呼名舊遊寺裏僧應識新別橋邊樹
已成公事况閑詩更好將隨相逐上山行

哭元九少府

平生志業獨相知早結雲山老去期初作學官常共
宿晚登朝列暫同時閑來各數經過地醉後齊吟唱
和詩今日春風花滿宅入門行哭見靈帷

送侯判官赴廣州從軍

年少才高求自展將身萬里赴軍門辟書遠到閑呈
客公服新成着謝恩驛舫過江分白候戍亭當嶺見
紅旛海花蠻草連冬有行處無家不滿園

答白杭州郡樓登望盡圖見寄

盡得江城登望處寄來今日到長安乍驚物色從詩
出更想工夫下手難將展書堂偏覺好每來朝士盡

求看見君向此閑吟意肯恨當時作外官

酬浙東元尚書見寄綾素

越地繒紗紋樣新遠封來寄學曹人便令裁製爲時服頓覺光榮上病身應念此官爲棄置獨能相賀更殷勤三千里外無由見海上東風又一春

贈項斯

端坐吟詩忘忍饑萬人中覓似君稀門連野水風長到驢放秋涼夜不歸日煖剩收桑落葉天寒更著舊生衣曲江庭上頻頻見爲愛鷓鴣雨裏飛

贈趙將軍

當年膽畧已縱橫每見妖星氣不平身貴早登龍尾道功高自破鹿頭城尋常得對論邊事委曲承恩掌內兵會取安西將報國凌烟閣上大書名

送和蕃公主

塞上如今無戰塵漢家公主出和親邑司猶屬宗卿寺冊號還同虜帳人九姓旗旛先引路一生衣服盡隨身羶城南望無迴日空見沙蓬水柳春

寒食內宴二首

朝光瑞氣滿宮樓
綵燾魚龍四面稠
廊下御厨分冷食
殿前香騎逐飛毬
千官盡醉猶教坐
百戲皆呈未放休
共喜拜恩侵夜出
金吾不敢問行由

又

城闕沈沈尚曉寒
恩當冷節賜餘歡
瑞煙深處開三殿
香雨微時引百官
寶樹樓前分繡幙
綵花廊下映華欄
宮筵戲樂年年別
已得三迴對御看

朝日勅賜櫻桃

仙果人間都未有
今朝忽見下天門
捧盤小吏初宣勅
當殿羣臣共拜恩
日色遙分廊下座
露香才出禁中園
每年重此長先熟
願得千春奉至尊

太白老人

日觀東峯幽客住
竹巾藤帶亦逢迎
暗脩黃籙無人見
深種胡麻共犬行
洞裏仙家常獨往
壺中靈藥自爲名
春泉四面遶茅屋
日日唯聞杵臼聲

和裴司空酬滿城楊少尹

聖朝偏重大司空
人詠元和第一功
擁節高臨襄水上
題詩遠入漢城中
共驚向老多年別
更憶登科舊

日同誰不望歸丞相府江邊楊柳又秋風

寄和州劉使君

別離已久猶爲郡閑向春風倒酒餅送客特過沙口
堰看花多上水心亭曉來江氣連城白雨後山光滿
郭青到此詩情應更遠醉中高詠有誰聽

贈商州王使君

銜命南來會郡堂却思朝裏接班行才雄猶是山城
守道薄初爲水部郎選勝相畱開客館尋幽更引到
僧房明朝從此辭君去獨出商關路漸長

寄令狐賓客

勲名盡得國家傳退狎琴僧與酒仙還帶郡符經幾
處暫辭台座已三年畱司未到龍樓下拜表長懷玉
案前秋日出城伊水好領誰相逐上閑船

寄梅處士

擾擾人間是與非官閑自覺省心機六行班裏身常
下九列符中事亦稀市客慣曾賒賤藥家童驚見着
新衣君今獨得居山樂應笑多時未辦歸

送施肩吾東歸

知君本是烟霞客被薦因來城闕間世業偏臨七里
瀨仙遊多在四明山早聞詩句傳人徧新得科名到
處閑惆悵灞亭相送去雲中琪樹不同攀

崑崙兒

崑崙家住海中州蠻客將來漢地遊言語解教秦吉
了波濤初過鬱林洲金環欲落曾穿耳螺髻長拳不
裹頭自愛肌膚黑如漆行時半脫木綿裘

贈李杭州

仙郎白首未歸朝應爲蒼生領六條惠化州人盡清

淨高情野鶴共逍遙竹間虛館無朝訟山畔青田長

夏苗終日政聲長獨坐開門唯望浙江潮

送鄭尚書赴廣州

聖朝選將持符節內制宣時百辟聽海北蠻夷來舞
蹈嶺南封管送圖經白鷗飛遶迎官舫紅檣開當燕
客亭此處莫言多瘴癘天邊看取老人星

賀秘書王丞南郊攝將軍

正初天子親郊禮詔攝將軍領衛兵斜帶銀刀入黃
道先隨玉輅到青城壇邊不在干官位仗外唯聞弄

拜聲共喜與君逢此日病中無計得隨行

送令狐尚書赴東都留守

朝廷重寄在關東共說從來選上公勲業新城大梁
鎮恩榮更守洛陽宮行香暫出天橋上巡禮常過禁
殿中每領羣臣拜章慶半開門伏日曛曛

拜豐陵

歲朝園寢遣公卿學省班中亦攝行身逐陵官齊再
拜手提木鐸叩三聲寒更報點來山殿曉炬分行照
栢城却下龍門看漸遠金峯高處日微明

贈孔尚書

能將直道歷榮班事著元和實錄間三表自陳辭北
闕一家相送入南山買來侍女教人嫁賜得朝衣在
篋閑宅近青山高靜處時歸林下暫開關

酬杭州白使君兼寄浙東元大夫

相印暫辭臨遠鎮掖垣出守復同時一行已作三年
別兩處空傳七字詩越地江山應共見秦天風月不
相知人間聚散真難料莫歎平生信所之

寄蘄州白二十二使君

三朝出入紫微臣頭白金章未在身登第早年同座
主題詩今日異州人閭門柳色煙中遠茂苑鶯聲雨
後新此處吟詩向山寺知君忘却曲江春

送白賓客分司東都

赫赫聲名三十春高情人獨出埃塵病辭省闥歸閑
處恩許宮曹作上賓詩裏難同相得伴酒邊多見自
由身老人也擬休官去便是君家池上人

贈閻少保

辭榮戀闕未還鄉脩養年多氣力強半俸歸燒伏火
藥全家解說養生方特承恩詔新開戟每見公卿不
下牀竹樹晴深寒院靜長懸石磬在虛廊

贈別王侍御赴任陝州司馬

京城在處閑人少唯共君行並馬蹄更和詩篇名最
出時傾盃酒典常齊同趨闕下聽鍾漏獨向軍前聞
鼓鼙今日春明門外別更無因得到街西

田司空入朝

西來將相位兼雄不與諸君覲禮同早變山東知順
命新收濟上立殊功朝官叙謁趨門外恩使宣迎滿

張文自集
路中閭闔曉來銅漏靜身當受冊大明宮

送浙西周判官

由來自是煙霞客早已聞名詩酒間天闕因將賀表
到家鄉新着賜衣還常吟卷裏相酬句自話湖邊舊
住山吳越主人偏愛重多應不肯放君閑

送吳鍊師歸王屋山

玉陽峯下學長生洞府仙鄉已有名獨戴熊鬚冠暫
出唯將鶴尾扇同行煉成雲母休炊爨召得雷公當
吏兵却到瑤壇上頭宿應聞空裏步虛聲

送邵州林使君

詞客南行寵命新瀟湘郡入曲江津山幽自足探微
處俗朴應無爭競人郭外相連排殿閣市中多半用
金銀知君不作家私計遷日還同到日貧

寄王六侍御

漸覺近來筋力少難堪今日在風塵誰能借問功名
事祇自扶持老病身積得藥資將助道肯嫌家計不
如人洞庭已置新居宅歸去期君與作鄰

送稽亭山寺僧

師住稽亭高處寺斜廊曲閣倚雲開山門十里松間
入泉澗三重洞裏來名岳尋遊今已徧家城禮謁便
應過舊房到日閉吟後林下還登說法臺

送汀洲元使君

曾成趙北歸朝計因拜王門最好官爲郡暫辭雙鳳
闕全家遠過九龍灘山鄉祇有輪蕉戶水鎮應多養
鴨欄地僻尋常來客少刺桐花發共誰看

寄孫洛陽格

久持刑憲聲名遠好是中朝正直臣赤縣上來應足
事青山老去未離身常思從省連歸馬乍覺同班少
舊人遙愛南橋秋日晚兩邊楊柳映天津

胡山人歸王屋因有贈

轉轉無成到白頭人間舉眼盡堪愁此生已是蹉跎
去每事終從鹵莽休雖作閑官少拘束難逢勝景可
淹留君歸與訪移家處若箇峯前最較幽

寄處州韓使君

南康太守負才豪五十如今未擁旄早得一人知姓
字常聞三事說功勞月明渡口漳江靜雲散城頭贛

石高郡政已成秋思遠閑吟應不問官曹

送從弟濛赴饒州

京城南去鄱陽遠風月悠悠別思勞
三領郡符新寄重再登科第舊名高
去程江上多看堆迎吏船中亦帶刀
到日更行清靜化春天應不見蓬蒿

羅道士

城裏無人得實年衣襟常帶臭黃煙
樓中賒酒唯畱藥洞裏爭棋不賭錢
聞客語聲知貴賤持花歌詠似狂顛
尋常行處頻逢見世上多疑是謫仙

寄陸渾趙明府

與君學省同官處常日相隨說道情
新作陸渾山縣長早知三禮甲科名
郭中時有仙人住城內應多藥草生
公事稀疎來客少無妨着屐獨閑行

同蔣韋二少監贈李郎中

舊年同過水曹郎各罷魚符自楚鄉
重着青衫承詔命齊趨紫殿異班行
別來同說經過事老去相傳補養方
憶得當時亦連步如今獨有讀書堂

贈王侍御

心同野鶴與塵遠詩似冰壺見底清
府縣同趨昨日事升沉不改故人情
上陽春晚蕭蕭雨洛水寒來夜
夜聲自歎獨爲折腰吏可憐
驄馬路傍行

送金少卿副使歸新羅

雲島茫茫天半微向東
萬里一帆飛久爲侍子承恩
重今佐使臣銜命歸過海
便應將國信到鄉猶自着
朝衣從前此去人無數
光彩如君定是希

送李司空赴鎮襄陽

中外兼權社稷臣千官齊出拜行塵
再調八閩勲庸盛三受兵符寵命新
商路雪開旗旆遠楚堤梅發驛亭春
襄陽風景由來好重與江山作主人

送李僕射赴鎮鳳翔

由來勲業屬英雄兄弟連榮列位同
走入賊城擒首惡盡封官庫讓元公
旗幟獨繼家聲外竹帛新添國史中
天子欲收秦隴地故教移鎮在扶風

寄白二十二舍人

早知內詔過先輩躑躅江南百事疎
湓浦城中爲上佐爐峯寺後著幽居
偏依仙法多求藥長共僧遊不

讀書三省比來名望重肯容君去樂樵漁

哭丘長史

曾見先皇殿上臣丹砂久服不成真常騎馬在嘶空
櫪自作書畱別故人詩句徧傳天下口朝衣徧送地
中身最悲昨日同遊處看却春風樹樹新

早朝寄白舍人嚴郎中

鼓聲初動未聞鷄羸馬街中踏凍泥燭暗有時衝石
柱雪深無處認沙堤常繁班裏人猶少待漏房前月
欲西鳳闕星官雖去遠閤門開口又還齊

送友人盧處士遊吳越

羨君東去見殘梅唯有王孫獨未回吳苑夕陽明古
堞越宮春草上高臺波生遠水鴈初下風滿驛樓潮
欲來試問漁舟看雪浪幾多江野荇花開

畱別微之

于時久與本心違悟道深知前事非猶厭勞形辭郡
印那能趣伴着朝衣五千言裏教知足三百篇中勸
式微少室雲邊伊水畔比君較老合先歸

送從弟刪東歸

張文昌集
雲水東南兩月程貪歸慶節馬蹄輕春橋欲醉攀花
別野路閑吟觸雨行詩價已高猶失意禮司曾賞會
成名舊山風月知應好莫過秋時不到京

送李餘及第後歸蜀

十年人好誦詩章今日成名出舉場歸去唯將新誌
牒後來爭取舊衣裳山橋曉上蕉花暗水店晴看芋
草黃鄉里親情相見日一時携酒賀高堂

蘓州江岸畱白樂天

銀泥裙映錦障泥書河停橈馬簇蹄清管曲終鸚鵡
語紅旗影動薄寒嘶漸消酒色朱顏淺欲話離情翠
黛低莫忘使君吟詠處汝墳湖北武丘西

張文昌集卷之六

五言絕句

和韋開州居山十二首

宿雲亭

清淨當深處，虛明向遠開。
卷簾無俗客，應口見雲來。

梅溪

自愛新梅好，行尋一徑斜。
不教人掃石，恐損落來花。

茶嶺

紫芽連白蘂，初向嶺頭生。
自看家人摘，尋常觸露行。

流杯渠

淥酒白螺杯隨流去復回似知人把處各向面前來
盤石磴

桃塢

壘石盤空遠層層勢不危不知行幾匝得到上頭時
春塢桃花發多將野客遊日西殊未散看望酒缸頭
竹巖

獨入千竿裏綠巖踏石層笋頭齊欲出更不許人登
琵琶臺

葫蘆沼

臺上綠蘿春閑登不待人每當休假日着屐戴紗巾
曲沼春流滿新蒲映野鶯閑齋朝飯後拄杖遶行多
隱月岫

綉衣石榻

月出深峯裏清涼夏亦寒每嫌西落疾不得到明看
山城無別味藥草兼魚果時有綉衣人同來石上坐
上土泉餅

堦上一眼泉四邊青石甃唯有護淨僧添餅將盥漱

涇州塞

行道涇州塞唯聞羌戍鼙道邊古雙堠猶記向安西
野田

漠漠野田草草中牛羊道古墓無子孫白楊不得老
岸花

可憐岸邊樹紅盡發青條東風吹渡水衝着木蘭橈
送遠客

憔悴遠歸客殷勤欲別杯九星壇下路幾日見重來
寄西峯僧

松暗水涓涓夜涼人未眠西峯月猶在遙憶草堂前
禪師

獨在西峯頂年年閉石房定中無弟子人到爲焚香
惜花

山中春已晚處處見花稀明日來應盡林間宿不歸
題暉師影堂

日早欲參禪竟無相識緣道場今獨到惆悵影堂前
別于鵠

離燈及晨暉行人起復思出門兩相顧青山路逶迤

別韋蘓州

百年愁裏過萬感醉中來
惆悵城西別愁眉兩不開
從軍行

孤心眠夜雪滿眼是秋沙
萬里猶防塞三年不見家

張文昌集卷之七

七言絕句

送蜀客

蜀客南行祭碧雞
木綿花發錦江西
山橋日晚行人少
時見猩猩樹上啼

蠻中

銅柱南邊毒草春
行人幾日到金潯
玉環穿耳誰家女
自抱琵琶迎海神

贈道士

張文昌集
六
蘇山近別剡溪逢玉節青旄十二重自說年年上天
去羅浮最近海邊峯

望平驛

茫茫菰草平如地渺渺長堤曲似城日暮未知投宿
處逢人更問向前程

宿天竺寺寄靈隱僧

夜向靈谿息此身風泉竹露淨衣塵月明石上堪同
宿那作山南山北人

送元紹

昔日同遊漳水邊如今重說恨綿綿天涯相見還相
別客路秋風又幾年

美人宮棊

紅燭臺前出翠娥海沙鋪局巧相和趨行移手巡收
盡數數看誰得最多

巒州

漳水蠻中入洞流人家多住竹棚頭青山海上無城
郭唯見松牌出象州

送元宗簡

張文昌集
貂帽垂肩窄皂裘雪深騎馬向西州暫時相見還相
送却閉閑門依舊愁

寄徐晦

鄠陂魚美酒偏濃不出琴齋見雪峯應勝昨來趨府
日簿書牀下亂重重

寄白學士

自掌天書見客稀縱因休沐鎖雙扉幾回扶病欲相
訪知向禁中歸未歸

喜王六同宿

十八年來恨別離唯同一宿詠新詩更相借問詩中
語共說如今勝舊時

題玉像堂

玉毫不着世間塵輝相分明十八身入夜無煙燈更
好堂中唯有轉經人

與賈島閑遊

水北原南草色新雪消風暖不生塵城中車馬應無
數能解閑行有幾人

哭丘長史

丘公已沒故人稀欲過街西更訪誰每到子城東路
上憶君相逐入朝時

哭孟寂

曲江院裏題名處十九人中最少年今日春光君不
見杏花零落寺門前

患眼

三年患眼今年免校與風光便隔生昨日韓家後園
裏看花猶似未分明

荅劉兢

劉君久被時拋擲老向城中作選人昨日街西相近
住每來存問老夫身

贈華嚴寺僧

一身依止荒閑院燭耀窓中有宿煙偏禮華嚴經裏
字不曾行到寺門前

逢故人

山東二十餘年別今日相逢在上都說盡向來無限
事相看盡是白髭鬚

送蕭遠第

張文昌集
街北槐花傍馬垂病身相送出門遲與君別後秋風
夜作得新詩說向誰

送辛少府任安縣

才多不肯浪容身老大詩章轉更新選得天台山下
住一家全作學仙人

贈任道人

長安多病無生計藥鋪醫人亂索錢欲得定知身上
事憑君爲筭小行年

招周居士

閑門秋雨濕墻莎俗客來稀野思多已掃書齋安藥
竈山人作意早經過

送許處士

高情自與俗人疎獨向藍谿選僻居會到白雲長取
醉不能窻下讀閑書

題楊秘書新居

愛閑不向爭名地宅在街西最靜坊卷裏詩過一千
首白頭新受秘書郎

送駐師

九星壇下煎茶別五老峯頭覓寺居
作得新詩旋相寄人來請莫達空書

送僧往金州

聞道溪陰山水好師行一一徧經過
事湏覓取堪居處若箇溪頭藥取多

尋徐道士

尋師遠到暉天觀竹院森森閉藥房
聞入靜來經七日仙童簷下獨焚香

荅韋開州寄車前子

開州午日車前子作藥人皆道有神慚愧使君憐
病眼三千餘里寄閑人

憶故州

累不爲山作野夫自收靈藥讀仙書
如今身是他州客每見青山憶舊居

送客遊蜀

行盡青山到益州錦城樓下二江流
杜家曾向此中住爲到浣花谿水頭

送陸暢

共踏長安街裏塵吳州獨作未歸身
貴門舊宅今誰住君過西塘與問人

感春

遠客悠悠任病身誰家池上又逢春
明年各自東西去此地看花是別人

贈李司議

漢庭誰問投荒客十歲天南看白衣
秋草茫茫惡谿路嶺頭遙送北人歸

別客

青山歷歷水悠悠今日相逢明日秋
繫馬橋邊楊柳樹爲君沽酒暫淹留

登樓寄胡家兄弟

獨上西樓盡日閑林煙裊漾鳥綿
蠻謝家兄弟重城裏不得同看雨後山

荅劉明府

身病多時又客居滿城親舊盡相疎
可憐絳縣劉明府猶解頻頻寄遠書

酬藤杖

病裏出門行步遲喜君相贈古藤枝倚來自覺身生
力每向傍人說得時

法雄寺東樓

汾陽舊宅今爲寺猶有當時歌舞樓四十年來車馬
客古槐深巷暮蟬愁

寄故人

靜曲閑房病客居蟬聲滿樹槿花疎故人祇在藍田
縣強半年來不得書

鄰婦哭征夫

雙鬟初合便分離萬里征夫不得隨今日軍回身獨
沒去時鞍馬別人騎

和崔附馬聞蟬

鳳凰樓下多歡樂不覺秋風暮雨天應爲昨來身暫
病蟬聲得到耳傍邊

和裴僕射看櫻桃花

昨日南園新雨後櫻桃花發舊枝柯天明不待人同
看遶樹重重履跡多

和郭明府縣中會飲

張文昌集
一樽清酒兩人同好在街西水縣中自恨病身相去
遠此時閑坐對秋風

唐興觀看花

新紅舊紫不相宜看覺從前兩月遲更向同來詩客
道明年到此莫過時

九華觀看花

街西無數閑遊處不似九華仙觀中花裏可憐池上
景幾回牆壁貯春風

贈姚合

丹鳳門前向曉開千官相次入朝來唯君獨走衝塵
上下馬橋邊報直廻

同韋員外開元覓尋時道士

觀裏初晴竹樹涼閑行共到最高房昨來官罷無生
計欲就師求斷穀方

同韓侍御南谿夜賞

喜作閑人得出城南谿兩月逐君行忽聞新命須歸
去一夜船中語到明

使行望悟真寺

採玉峯連佛寺幽高高斜對驛門樓無端來去騎官
馬寸步教身不得遊

重陽日至峽道

無限青山行已盡回看忽覺遠離家逢高欲飲重陽
酒山菊今朝未見花

贈王客劉郎中

憶昔君登南省日老夫猶是褐衣身誰知二十餘年
後來作學曹相替人

唐昌觀玉蕊仙二首

千枝花裏玉塵飛阿母宮中見亦稀應共諸仙鬪百
草獨來偷折一枝歸

又

九色雲中紫鳳車尋仙來到洞仙家飛輪回處無蹤
跡唯有班班滿地花

秋思

洛陽城裏見秋風欲作家書意萬重復恐匆匆說不
盡行人臨發又開封

憶遠

行人猶未有歸期
萬里初程日暮時
唯愛門前雙柳樹
樹枝枝葉葉不相離

玉仙館

長谿新雨色如泥
野水陰雲盡向西
楚客天南行漸遠
山山樹裏鷓鴣啼

寄府吏

野水尋花共作期
今朝出郭不相隨
待君公事有閑日
此地春風應過時

涼州詞二首

邊城暮雨鴈飛低
蘆葦初生漸欲齊
無數鈴聲遙過磧
應馱白練到安西

又

古鎮城門白磧開
胡兵往往傍沙堆
巡邊使客行應早
欲問平安無使來

又

鳳林關裏水東流
白草黃榆六十秋
邊將皆承三王恩
澤無人解道取涼州

宮詞二首

新鷹初放兔猶肥
白日君王在內稀
薄暮千門臨欲
鎖紅粧飛騎向前歸

又

黃金捍撥紫檀槽
絃索初張調更高
盡理昨來新上
曲內官簾外送櫻桃

華清宮

溫泉流入漢離宮
宮樹行行浴殿空
武帝時人今欲
盡青山空閉御墻中

崔駙馬養鶴

身閑無事稱高情
已有人間章句名
求得鶴來教剪
翅望仙臺下亦將行

閑遊二首

老身不計人間事
野寺秋晴每獨過
病眼校來猶斷
酒却嫌行處菊花多

又

終日不離塵土間
若爲能見此身閑
今朝暫共遊僧
語更恨趨時別舊山

劉兵曹贈酒

一瓶顏色似甘泉開向新栽小竹前
飲罷身中更無事移床獨就日陽眠

送王梧州

楚江亭上秋風起看發蒼梧太守船
千里同行從此別相逢又隔幾多年

春日早朝

曉陌春寒朝騎來瑞雲深處見樓臺
夜來新雨沙堤濕東上閣門應未開

寄朱闕二山人

爲箇朝音此身眼看東路去無因
歷陽舊客今應少轉憶隣家二老人

寄李渤

五度谿頭躑躅紅嵩陽寺裏講時鍾
春山處處行應好一月看花到幾峯

尋仙

谿頭一徑入青崖處處仙居隔杏花
更見峯西幽客說雲中猶有兩三家

寄王奉御

愛君紫閣峯前好新作書堂藥竈成見欲移居相近
住有田多與種黃精

題渭北寺上方

昔祭郊壇今謁陵寺中高處復來登十餘年後人多
別喜見當時轉讀僧

同白侍郎杏園贈劉郎中

一去瀟湘頭欲白今朝始見杏花春從來遷客應無
數重到花前有幾人

答鄱陽客藥名詩

江臯歲暮相逢地黃葉霜前半夏枝子夜吟詩向松
桂心中萬事喜君知

寄宋景

詔發官兵取亂臣將軍弓箭不離身君今獨在征東
府莫遣功名屬別人

倡女詞

輕鬢叢梳闕掃眉爲嫌風日下樓稀畫羅金縷難相
稱故着尋常淡薄衣

答元八遺紗帽

黑紗方帽君邊得稱到山前坐竹床唯恐被人偷樣
剪不曾閑戴出書堂

題僧院

聞師行講青龍院本寺住來多少年靜掃空房唯獨
坐千莖秋竹在簷前

送元八

百神齋祭相隨徧尋竹看山亦共行明日城西送君
去舊遊重到獨題名

吳楚歌詞

庭前春鳥啄林聲紅夾羅襦縫未成今朝社日停針
線起向朱櫻樹下行

題方睦上人月臺觀

一身清淨無童子獨坐空堂得幾年每夜焚香通月
觀可憐光景最團圓

華山廟

金天廟下西京道巫女紛紛六似煙手把紙錢迎過
客遣求恩福到神前

病中酬元宗簡

張文昌集
東風漸暖滿城春獨向深房養病身莫說櫻桃花已
發今年不作看花人

寺宿齋

晚到金光門外寺寺中新竹隔簾多齋宮禁與僧相
見院院開門不得過

贈施肩吾

世間漸覺無多事雖有空名未着身合取藥成相待
喫不瀆先作上天人

贈王建

于君去後交游少東野下來篋笥貧賴有白頭王建
在眼前猶見詠詩人

逢賈島

僧房逢着款冬花出寺行吟日已斜十二街中春
滿馬蹄今去入誰家

離宮怨

高堂別館連湘渚長向春江開萬戶荆王去去不復
來宮中美人自歌舞

春別曲

長江春水綠堪染蓮葉出水大如錢江頭橋樹君自
種那不長繫木蘭船

成都曲

錦江近西煙水綠新雨山頭荔枝熟萬里橋邊多酒
家遊人愛向誰家宿

楚妃怨

梧桐葉下黃金井橫架轆轤牽素綆美人初起天未
明手拂銀瓶秋水冷

寒塘曲

寒塘沉沉柳葉疎水暗人語驚栖鳥舟中少年醉不
起持燭照水射游魚

春堤曲

野塘鴉鵲飛樹頭綠蒲紫菱葢碧流狂客誰家愛雲
水日日獨來城下遊

山禽

山禽毛如白練帶栖我庭前栗樹枝獼猴半夜來取
栗一雙中林向月飛

秋山

秋山無雲復無風溪頭看月出深松草堂不閉石床
靜葉間隊上露聲重重

宿山祠

秋草宮人斜裏墓宮人誰送送葬來時千千萬萬皆如
此家在邊城亦不知

送律師歸婺州

京中開講已多時曾作壇頭證戒師歸到雙溪橋北
寺鄉僧爭就學威儀

無題

桃蹊柳陌好經過燈下粧成月下歌爲是襄王故宮
地至今猶有細腰多

山中醜人

山中日暖春鳩鳴逐水看花任意行向晚歸來石窻
下菖蒲葉上見題名

題故僧影堂

香消雲鎖舊僧家僧利殘形半壁斜日暮松烟寒漠
漠秋風吹破絳蓮花

弱栢院僧影堂

弱栢倒垂如線蔓簷頭不見有枝柯影堂香火長相
續應得人來禮拜多

玉真觀

臺殿曾爲貴王家春風吹盡竹牕紗院中仙女修香
火不許閑人入看花

弟蕭遠雪夜同宿

數卷新遊蜀客詩長安僻巷得相隨草堂雪夜携琴
宿說似青城館裏時

虎丘寺

望日登樓海氣昏劍池無底浸雲根老僧只怕山移
去日暮先教鎖寺門

贈劉郎中

怪君把酒空惆悵同是貞元花下人自別花來多少
事東風二十四回春

酬朱慶餘

越女新粧出鏡心自知明豔更沉吟齊紈未是人間
貴一曲菱歌敵萬金

綺繡宮

張文昌集
玉樓傾倒粉牆空，重疊青山繞故宮。
武帝去來紅袖盡，野花黃蝶領春風。

張文昌集卷之八

書

與韓愈書

古之胥教誨舉動言語無非相示以義，非苟相諛悅而已。執事不以籍愚昧時稱發其善教所不及也。誠相與不間，塞於他人之說是近於古人之道也。籍今不復以義是執竿而拒歡來者，烏所謂承人以古人之道歟？湏承論於執事，嘗以爲世俗陵靡不及古昔，蓋聖人之道廢弛之所爲也。宣尼歿後，楊朱墨翟恢

詭異說于惑人聽孟軻作書而正之聖人之道復存於世秦氏滅學漢重以黃老之術教人使人寢惑楊雄作法言而辯之聖人之道猶明及漢衰末西域浮屠之法入于中國中國之人世世譯而廣之黃老之術相沿而熾天下之言善者惟二者而已矣昔者聖人以天下生生之道曠乃物其金木水火土穀藥之用以厚之因人資善乃明乎仁義之德以教之俾人有常故治生相存而不殊今天下資於生者咸備聖人之器用至於人情則溺乎異學而不由乎聖人之道使君臣父子夫婦朋友之義沉于世而邦家繼亂固仁人之所痛也自楊子雲作法言至今近千載莫有言聖人之道者言之者惟執事焉耳習俗者聞之多怪而不信徒相爲訾終無裨于教也執事聰明文章與孟軻楊雄相若盍爲一書以興存聖人之道使時之人後之人知其去絕異學之所爲乎曷可俯仰於俗囂囂爲多言之徒哉然欲舉聖人之道者其身亦由之也比見執事多尚駁雜無實之說使人陳之於前以爲歡此有以累於令德又商論之際或不

人之短如任私尚勝者亦有所累也先王存六藝自有常矣有德者不爲猶以爲損况爲博塞之戲與人競財乎君子固不爲也今執事爲之以廢棄時日竊實不識其然且執事言論文章不謬於古人今所爲或有不於世之守常者竊未爲得也願執事絕博塞之好棄無實之談弘廣以接天下之士嗣孟軻楊雄之作辯楊墨老釋之說使聖人之道復見於唐豈不尚哉籍誠知之以材識頑鈍不敢竊居作者之位所以資於執事而爲之爾若執事守章句之學因循於時置不朽之盛衰與夫不知言亦無以異矣籍再拜

重與韓退之書

籍不以其愚輒進說於執事執事以導進之分復賜還荅曲折教之使昏塞者不失其明然猶有所見願復於執事以畢其說焉夫老釋惑乎生人久矣誠以世相沿化而莫之知所以久惑乎耳執事材識明曠可以任著書之事故有告焉今以爲言論之不入則雖觀書亦無所得爲此而止未爲至也夫處一位在一

鄉其不知聖人之道可以言論之不入乃舍之猶有已化者爲證也天下至廣民事至衆豈可資一人之口而親論之者近而不入則舍之遠而有可論者又豈可以家至而說之乎故曰莫若爲書爲書而知者則可以化乎天下矣可以傳于後世矣若以不入者而止爲書則爲聖人之道奚傳焉士之壯也或從事於要劇或旅遊而不安宅或偶時之喪亂皆不遑有所爲况有疾疢吉凶虞其間哉是以君子汲汲於所欲爲恐終無所顯於後若皆待五六十而後有所爲

則或有遺根矣今執事雖參於戎府當四海弭兵之際優游無事不以此時著書而曰俟後或有不及曷可追乎天之與人性度不相遠也不必老而後有成立者昔顏子之廢幾豈待五六十乎執事目不睹聖人而究聖人之道材不讓於顏子矣今年已踰之曷懼于年未至哉顏子不著書者以其從聖人之後聖人已定制故也若顏子獨立于世必有所云著也古之學君臣父子之道必資於師師之賢者其徒數千或數百人是以沒則紀其師之說以爲書若子孟軻

者是已傳者猶以孟軻自論集其書不云沒後其徒
爲之也後軻之世發明其學者楊雄之徒咸自作書
今師友道喪侵不及楊雄之世不自論著以興聖人
之道欲待孟軻之門人必不可異也君子發言舉足
不遠於理未嘗聞以駁雜無實之說爲戲也執事每
見其說亦拊拊呼笑是撓氣害性不得其正矣苟正
之不得曷所不至焉或以爲中不失正將以苟悅於
衆是戲人也是玩人也非示人以義之道也